



ПРЕДСТАВНИЧКИ ДОМ

PREDSTAVNIČKI DOM / ZASTUPNIČKI DOM

Истражна комисија Представничког дома  
Парламентарне скупштине БиХ за утврђивање  
стања у Извозно-кредитној агенцији БиХ

Istražna komisija Predstavničkog doma  
Parlamentarne skupštine BiH za utvrđivanje  
stanja u Izvozno-kreditnoj agenciji BiH

Istražno povjerenstvo Zastupničkog doma  
Parlamentarne skupštine BiH za utvrđivanje  
stanja u Izvozno-kreditnoj agenciji BiH

Broj: 01-50-5-223-9,9/17  
Sarajevo, 12. 06. 2017. godine

BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINA  
SARAJEVO

PRIMLJENO: 27-06-2017

Organizaciona jedinica	Klasifikaciona oznaka	Redni broj	Broj priloga


KOLEGIJ PREDSTAVNIČKOG DOMA  
PARLAMENTARNE SKUPŠTINE BiH

Predmet: DOSTAVA IZVJEŠTAJA

Uvaženi članovi Kolegija,

U prilogu vam dostavljamo Izvještaj o radu Istražne komisije Predstavničkog doma Parlamentarne skupštine BiH za utvrđivanje stanja u Izvozno-kreditnoj agenciji BiH, i predlažemo da isti uvrstite na dnevni red prve naredne sjednice Predstavničkog doma.

S poštovanjem,



Predsjedavatelj Istražne komisije

Erdoğlan Kožul



ПРЕДСТАВНИЧКИ ДОМ

PREDSTAVNIČKI DOM / ZASTUPNIČKI DOM

Истражна комисија Представничког дома  
Парламентарне скупштине БиХ за утврђивање  
стања у Извозно-кредитној агенцији БиХ

Istražna komisija Predstavničkog doma  
Parlamentarne skupštine BiH za utvrđivanje  
stanja u Izvozno-kreditnoj agenciji BiH

Istražno povjerenstvo Zastupničkog doma  
Parlamentarne skupštine BiH za utvrđivanje  
stanja u Izvozno-kreditnoj agenciji BiH

---

Broj: 01,50-5-233-9,9/17

Sarajevo, 6.6. 2017.

PREDSTAVNIČKI DOM  
PARLAMENTARNE SKUPŠTINE BiH

Na osnovu čl. 29. i 31. Poslovnika Predstavničkog doma Parlamentarne skupštine BiH, Istražna komisija Predstavničkog doma za utvrđivanje stanja u Izvozno-kreditnoj agenciji BiH (u kojoj su: Predrag Kožul, Dušanka Majkić, Šemsudin Mehmedović, Mensura Beganović, Mirsad Isaković, Nenad Lalić i Mirsad Mešić)

podnosi

**IZVJEŠTAJ O RADU**

**Istražne komisije Predstavničkog doma Parlamentarne skupštine BiH za utvrđivanje stanja u Izvozno-kreditnoj agenciji BiH**

## **I. UVODNI DIO**

Istražna komisija Predstavničkog doma PSBiH za utvrđivanje stanja u Izvozno-kreditnoj agenciji BiH (u daljnjem tekstu: Istražna komisija) formirana je na 30. sjednici Predstavničkog doma PSBiH, održanoj 24.5.2016., sa zadatkom da utvrdi stanje u Izvozno-kreditnoj agenciji Bosne i Hercegovine (da li su ispoštovane sve zakonske norme u poslovanju Agencije), te da o tome podnese izvještaj Predstavničkom domu Parlamentarne skupštine BiH.

## **II. ČLANOVI KOMISIJE**

Za članove Istražne komisije imenovani su:

1. Predrag Kožul (HDZ)
2. Dušanka Majkić (SNSD)
3. Šemsudin Mehmedović (SDA)
4. Mensura Beganović (DF)
5. Mirsad Isaković (SBBBiH)
6. Nenad Lalić (SDS)
7. Mirsad Mešić (SDP)

## **III. SJEDNICE KOMISIJE**

**Konstituirajuća sjednica održana je 15.6.2016.**

Sjednicu je sazvao sekretar Predstavničkog doma Parlamentarne skupštine BiH. Sjednici su prisustvovali članovi Istražne komisije: Predrag Kožul, Dušanka Majkić, Šemsudin Mehmedović, Mensura Beganović, Nenad Lalić, Mirsad Mešić i Mirsad Isaković.

Za predsjedavajućeg Istražne komisije izabran je Predrag Kožul, a za njegove zamjenike Šemsudin Mehmedović (prvi zamjenik) i Dušanka Majkić (druga zamjenica).

**Druga sjednica Istražne komisije održana je 18.7.2016.**

Sjednici su prisustvovali članovi Istražne komisije: Predrag Kožul, Šemsudin Mehmedović, Dušanka Majkić, Mensura Beganović, Nenad Lalić, Mirsad Mešić i Mirsad Isaković.

Na sjednici je usvojen Poslovnik o radu Istražne komisije i dogovoren način rada.

Jednoglasno je prihvaćen prijedlog predsjedavajućeg Komisije da se do naredne sjednice Komisije, na kojoj će se raspravljati o metodologiji rada i narednim koracima u vezi s utvrđivanjem stanja u Izvozno-kreditnoj agenciji BiH, osiguraju izvještaji o radu Upravnog odbora Izvozno-kreditne agencije BiH zajedno s revizorskim izvještajima za period 2011.-2015.

**Treća sjednica Istražne komisije održana je 31.8.2016.**

Sjednici su prisustvovali članovi Istražne komisije: Predrag Kožul, Šemsudin Mehmedović, Dušanka Majkić, Mensura Beganović, Mirsad Isaković, Mirsad Mešić i Nenad Lalić.

Komisija je razmatrala izvještaje o radu Upravnog odbora Izvozno –kreditne agencije BiH za period 2011-2015.

Članovi Komisije jednoglasno su donijeli odluku da se u skladu s nadležnostima Komisije obavi javno saslušanje predstavnika Izvozno-kreditne agencije BiH.

**Četvrta sjednica Istražne komisije održana je 3.11.2016.**

Sjednici su prisustvovali članovi Istražne komisije: Predrag Kožul, Šemsudin Mehmedović, Dušanka Majkić, Mensura Beganović, Mirsad Isaković i Nenad Lalić.

Odsustvo je opravdao Mirsad Mešić.

U skladu s članom 37. (1) Poslovnika Predstavničkog doma, obavljeno je javno saslušanje rukovodstva i članova Upravnog odbora Izvozno-kreditne agencije BiH, kojem su prisustvovali: direktorica Lamija Rahman-Kozarić, pomoćnici direktorice: Mirko Dejanović i Lazar Prkačin, Mira Bradara, predsjedavajuća Upravnog odbora IGA-e, Dragana Lažetić, zamjenica predsjedavajuće, Gordana Praštalo, članica, Adisa Banović, članica, i Goran Mirašić, član.

**Peta sjednica Istražne komisije održana je 12.12.2016.**

Sjednici su prisustvovali članovi Istražne komisije: Predrag Kožul, Šemsudin Mehmedović, Dušanka Majkić, Nenad Lalić, Mensura Beganović i Mirsad Mešić.

Odsustvo sa sjednice opravdao je Mirsad Isaković.

Istražna komisija donijela je Zaključak da će u skladu s članom 39. stav b) Poslovnika Predstavničkog doma PSBiH pozvati predstavnike ministarstava koji su upoznati s radom Izvozno-kreditne agencije BiH, i to: Ministarstva finansija i trezora BiH, Ministarstva pravde BiH, Ministarstva vanjske trgovine i ekonomskih odnosa BiH, Federalnog ministarstva Federacije BiH i Ministarstva finansija Republike Srpske.

**Šesta sjednica Istražne komisije održana je 19.1.2017.**

Sjednici su prisustvovali članovi Istražne komisije: Predrag Kožul, Šemsudin Mehmedović, Mensura Beganović i Nenad Lalić.

Odsustvo su opravdali: Dušanka Majkić, Mirsad Isaković i Mirsad Mešić.

Sjednici su prisustvovali i: Hamdo Tinjak, sekretar Ministarstva vanjske trgovine i ekonomskih odnosa BiH, Gordana Praštalo, načelnica Odjeljenja za vanjski dug Ministarstva finansija Republike Srpske, i Nusreta Čerkez, šefica Odsjeka za bankarstvo Federalnog ministarstva finansija.

**Sedma sjednica Istražne komisije održana je 22. 3. 2017.**

Sjednici su prisustvovali članovi Istražne komisije: Predrag Kožul, Šemsudin Mehmedović, Mensura Beganović, Mirsad Mešić, Nenad Lalić i Mirsad Isalović.

Odsustvo je opravdala Dušanka Majkić.

Sjednici su prisustvovali i: predstavnici uprave IGA-e, direktorica Lamija Rahman-Kozarić, pomoćnici direktorice Mirko Dejanović i Lazar Prkačin, pomoćnik ministra finansija i trezora BiH Mirosljub Krnić i predstavnica Ministarstva pravde BiH Olga Lučić - Radić.

**Osma sjednica Istražne komisije održana je 8.5.2017.**

Sjednici su prisustvovali članovi Istražne komisije: Predrag Kožul, Šemsudin Mehmedović, Dušanka Majkić, Mensura Beganović i Nenad Lalić.

Odsustvo opravdali Mirsad Isaković i Mirsad Mešić.

Na sjednici se raspravljalo o okončanju rada Komisije te o prijedlozima zaključaka koji će ući u Izvještaj o radu Komisije koji će biti dostavljen Predstavničkom domu na daljnje postupanje.

**Deveta sjednica Istražne komisije održana je 29. 5. 2017.**

Sjednici su prisustvovali članovi Istražne komisije: Predrag Kožul, Šemsudin Mehmedović, Dušanka Majkić, Mensura Beganović, Mirsad Mešić, Nenad Lalić i Mirsad Mešić.  
Na sjednici se raspravljalo o prijedlozima zaključaka i Izvještaju o radu Komisije koji će biti dostavljen Predstavničkom domu na daljnje postupanje.

**Nastavak devete sjednice Istražne komisije održan je 6.6.2017.**

Sjednici su prisustvovali članovi Istražne komisije: Predrag Kožul, Mensura Beganović, Šemsudin Mehmedović, Mirsad Isaković, Mirsad Mešić i Nenad Lalić.  
Odsustvo sa sjednice opravdala je Dušanka Majkić.

Na sjednici su usaglašeni zaključci i usvojen Izvještaj o radu Istražne komisije.

#### **IV. DOPISI KOJE JE ISTRAŽNA KOMISIJA UPUTILA NADLEŽNIM INSTITUCIJAMA**

Dopisi su upućeni:

1. Izvozno-kreditna agencija BiH i Uporavni odbor IGA-e (dopis broj: 01,50-5-1621-3,6/16, od 19.10.2016; dopis broj: 01-50-5-223-6,15/17, od 16.2.2017.)
2. Ministarstvo finansija i trezora BiH (dopis broj: 01,50-5-1621-5,7/16, od 13.12.2016.)
3. Ministarstvo pravde BiH (dopis broj: 01,50-5-1621-5,7/16, od 13. 12. 2016.)
4. Ministrastvo vanjske trgovine i ekonomskih odnosa BiH (dopis broj: 01,50-5-1621-5,7/16, od 13. 12. 2016.)
5. Ministrastvo finansija Federacije BiH (dopis broj: 01,50-5-1621-5,7/16, od 13. 12. 2016.)
6. Ministarstvo finansija Republike Srpske (dopis broj: 01,50-5-1621-5,7/16, od 13. 12. 2016.)

#### **V. NALAZI ISTRAŽNE KOMISIJE**

**Istražna komisija je u toku svog rada konstatirala sljedeće:**

1. Izvozno-kreditna agencija BiH (IGA) uspostavljena je u oktobru 1997. godine, kao agencija s ciljem realizacije projekta hitnog pokretanja industrije, koji je finansirala Svjetska banka, na nivou BiH, uz izdavanje garancija od političkog i ratnog rizika stranim investitorima i trgovcima. U tom projektu RS nije učestvovala.
2. Tokom 1999. godine IGA započinje realizaciju Projekta Svjetske banke za podršku izvoznim preduzećima na nivou BiH u iznosu od 8.900.000 specijalnih prava vučenja (SDR). Raspoloživa sredstva plasirana su izvoznim preduzećima kroz finansiranje pripreme izvoza, kao obezbjeđenje s ciljem dobivanja garancija za ugovorene poslove, te kao kapital za osiguranje izvoza i uvoza.
3. Republika Srpska je, za navedene projekte, naknadno zaključila s BiH sporazume o podršci projektu kojim se obavezala da će otplaćivati kreditna sredstva u skladu s utvrđenim procentom raspodjele primjenom principa krajnjeg korisnika, što se tako i provodilo.
4. S obzirom na to da tražnja izvoznih preduzeća vremenom postaje sve veća, IGA pored sredstava dobivenih od Svjetske banke, osigurava sredstva iz drugih izvora, kao što su lokalne i strane banke, Lojd i druge evropske reosiguravajuće kuće.

5. PSBiH je 2004. godine donijela Zakon o Izvozno-kreditnoj agenciji BiH, kojim je IGA osnovana i kojim je utvrđen njen rad kao izvozno-kreditne agencije BiH sa osnivačkim kapitalom od 51.350.000 KM, od čega su kreditna sredstva Svjetske banke 38.183.000 KM i odobreni grant Svjetske banke 13.167.000 KM.
6. Kapital koji je IGA dobila do danas nije raspodijeljen između BiH i entiteta, jer je BiH tražila da bude vlasnik granta sredstava (13.167.000 KM), a entiteti da budu vlasnici kreditnih sredstava (38.183.000 KM). To nije bilo prihvatljivo za Republiku Srpsku jer su se kreditna i grant sredstva stavljala na raspolaganje krajnjim korisnicima u oba entiteta, pa je iz tog razloga Republika Srpska tražila da participira i u grant sredstvima.
7. Istražna komisija utvrdila je da Zakon o IGA-i nije proveden u najznačajnijem dijelu. Do danas nije konstituirano *Međuministarsko vijeće* čija je nadležnost da razmatra podnesene informacije o poslovanju IGA-e i donosi smjernice koje su obavezujuće za rad IGA-e. Međuministarsko vijeće (član 15. Zakona) čine: Ministarstvo finansija i trezora BiH, Ministarstvo vanjske trgovine i ekonomskih odnosa BiH, po dva predstavnika vlada entiteta iz nadležnih ministarstava.)
8. Istražna komisija utvrdila je da Zakon o osnivanju IGA-e nije pružio zadovoljavajući i precizan zakonski okvir za rad ove agencije. Nejasne su odredbe u kojima se definiraju prava, obaveze, imovina i međusobna koordinacija osnivača, odredbe u kojima se definiraju način i rokovi izbora, imenovanja i razrješenja Upravnog odbora i Međuministarskog vijeća, odredbe u kojima se definiraju praćenje izvještaja i nadzor nad radom. Osim Statuta, nema drugih podzakonskih akata.
9. Od osnivanja do danas, IGA je svojim kapitalom podržala izvozne ugovore sa oko 150 izvoznih preduzeća kroz sljedeće finansijske proizvode:
- |   |                                |
|---|--------------------------------|
| 1) Poslovi faktoringa u iznosu:             | 137.404.754,00 KM ili 4,42%    |
| 2) Poslovi kreditnog osiguranja u iznosu:   | 252.226.692,25 KM ili 8,10%    |
| 3) Garancijske ugovore u iznosu:            | 2,443.014.829,00 KM ili 78,53% |
| 4) Poslove kreditiranja obrtnog kapitala:   | 278.456.876,00 KM ili 8,95%    |
| <b>UKUPNO: 3,111.103.151,35 KM ili 100%</b> |                                |
10. Početkom globalne finansijske i ekonomske krize IGA je prepoznata kao izvozno-kreditna agencija i institucija BiH koja je mogla podržati velike projekte izvoznih firmi. Međutim, nedostatak kapitala bio je ograničavajući faktor, posebno od 2008. godine kada su finansijski proizvodi IGA-e postajali sve više traženi na bh. tržištu. Uočeno je da u periodu 2009. do 2012. godine dolazi do velikog rasta garantnog portfolija IGA-e.
11. Posljedice globalne ekonomske i finansijske krize odrazile su se na poslovanje IGA-e, posebno u poslovanju s *Unis-fabrikom cijevi* Derventa, ali i ostalim klijentima. *Unis fabrika cijevi* bila je jedan od najvećih klijenata IGA-e i jedan od 10 najvećih izvoznika iz

RS-a, ali pad cijena čelika tokom 2012. godine doveo je do problema u poslovanju ove kompanije.

12. U 2011. godini za *Unis - fabriku cijevi* Derventa obnovljene su izdate garancije u visini od 28.000.000 eura

- u 2012. godini - dodatnih 15.000.000 eura.

- u 2013. godini - oko 40. 000. 000 eura.

Odgovorni iz IGA-a upoznali su Istražnu komisiju s dobrom dugogodišnjom saradnjom s *Unisom-fabrikom cijevi* Derventa i izvozom proizvoda na tržište EU, koja se u periodu 2010., 2011. i 2012. godini kretala oko 15% ukupnog izvoza šavnih cijevi na tržište EU. Kupci proizvoda *Unis- fabrike cijevi* Derventa bile su multinacionalne kompanije.

13. Od 2013. godine IGA se nalazi u teškim finansijskim problemima, a pretjerana izloženost prema *Unis- fabrici cijevi* Derventa, koji je zapao u finansijske probleme, uzrokovala je protest garancija u iznosu 175.600.000 KM, što je tri puta više od kapitala IGA-e.

Protest svih garancija izvršen je odjednom, krajem 2013. godine, iako je veći broj garancija dospijevao tek 2014., 2015. ili 2016. godine.

Stanje kapitala IGA-e je negativno, a izazvano je pozvanim garancijama *Unis-fabrike cijevi*, tako da su raspoloživa sredstva (likvidnost) pokrivala svega 10 % tih garancija.

14. Upravni odbor IGA-e je 2013. godine informiran da je *Unis- fabrika cijevi* Derventa zapala u probleme i da ne izmiruje dospjele obaveze i naložio IGA-i da preduzme sve mjere s ciljem zaštite svog kapitala, pokretanjem svih pravnih radnji za naplatu instrumenata osiguranja potraživanja. O preduzetim aktivnostima Upravni odbor IGA-e je u više navrata u posljednje dvije godine informirao Vijeće ministara BiH, Ministarstvo finansija i trezora BiH i Parlamentarnu skupštinu BiH.

15. Utvrđeni su značajni propusti u radu Uprave za indirektno oporezivanje s *Unis- fabrikom cijevi* Derventa vezano za praćenje uvezenog repromaterijala kao i izvoza gotovih proizvoda, što je u direktnoj vezi s međusobnim poslovanjem IGA-e i *Unis - fabrikom cijevi* Derventa.

16. Na osnovu ranije pokrenutih aktivnosti, isključujući deficite izazvane problemima u *Unis- fabrici cijevi*, IGA je u 2015. godini u mogućnosti da svojim prihodima od tih aktivnosti, pokriva rashode, ali nije u mogućnosti da stvori značajne prihode i tokove novca koji bi joj omogućili samostalan finansijski oporavak.

Protest garancija i tužbe pokrenute protiv IGA-e, kao i nemogućnost reosiguranja uzrokovali su značajno reduciranje poslovnih aktivnosti IGA-e i izostanak kvalitetne podrške bh. izvozniciima.

17. Iz evidencije IGA-e vidljivo je da je ona, putem advokata, kod nadležnog suda u Sarajevu, 28. 4. 2014. predala tužbu kojom su tužena društva:

1. *Unis - fabrika cijevi* Derventa

2. *Balkan Steel International-Lichtenstein* (većinski vlasnik) te

3. Akcionarsko društvo a.d. RTV „Luka“ – Šamac (kao korporativni jamac),

a radi isplate duga u vrijednosti 178.693.906,72 KM.

18. IGA je od 7.9.2015. uputila Ministarstvu pravde BiH zahtjev za informaciju o toku postupka po zamolnici Općinskog suda u Sarajevu u vezi s parničnim sudskim postupkom, a kako nije dobila nikakav odgovor, 28.10.2015. obratila se Vijeću ministara BiH i Ministarstvu pravde BiH po istom pitanju.

19. Osim pokretanja sudskog postupka, IGA je izvršila blokadu transakcijskih računa *Unis-fabrike cijevi* Derventa. Međutim, nakon tužbe *Unis-fabrike cijevi* protiv IGA-e za neovlašteno blokiranje računa, Općinski sud u Doboju (iako nije bio nadležan za ovaj predmet) donosi privremenu mjeru skidanja blokade računa od strane IGA-e, te zabranu ponovnog blokiranja računa. Evidentno je da je *Unis-fabrika cijevi* Derventa tužila IGA-u za naknadu štete uzrokovanu neovlaštenom blokadom, iako šteta nije ni načinjena, jer su računi već bili blokirani prije nego što je IGA podnijela mjenicu na naplatu. Napominjemo da IGA ima u posjedu i drugu bjanko mjenicu, koju može predati na naplatu ako ocijeni da ima mogućnost da po njoj izvrši bilo kakvu naplatu.

20. Imajući u vidu sve teškoće u kojima se nalazi IGA, Ministarstvo finansija i trezora BiH, Ministarstvo finansija Republike Srpske, Federalno ministarstvo finansija, na zahtjev IGA-e, obratili su se Svjetskoj banci sa zahtjevom da tehnička misija Svjetske banke izvrši ocjenu stanja i dostavi prijedlog rješenja za prevazilaženje postojećeg stanja u Izvorno-kreditnoj agenciji BiH.

- Svjetska banka napravila je analizu i ocjenu postojećeg stanja i predložila šest različitih rješenja: od prijedloga da se ne preduzimaju nikakve aktivnosti, do prijedloga da se postojeća IGA likvidira i osnuje nova agencija.

- Važno je napomenuti da SVE PREDLOŽENE OPCIJE (izuzev opcije 1) pretpostavljaju stvaranje novog pravnog okvira, posebno u slučaju preuzimanja izmirenja duga prema povjericima, u kojem bi moralo jasno biti naznačeno ko preuzima dug.

Posebno treba sagledati nove okolnosti vezano za poslovanje Unis - Fabrike cijevi koje se dešavaju u prvom kvartalu 2017. godine, a odnose se na izradu i prihvaćanje Plana finansijskog i operativnog restrukturiranja UNIS-FC Derventa. Ovaj plan predstavlja za IGA-u povoljne okolnosti koje treba analizirati i imati u vidu kod odabira daljnjih rješenja.



## VI. ZAKLJUČCI

Istražna komisija Predstavničkog dom Parlamentarne skupštine BiH donosi sljedeće zaključke i predlaže Predstavničkom domu PSBiH da ih usvoji.

1. Usvaja se Izvještaj o radu Istražne komisije Predstavničkog doma PSBiH u vezi s utvrđivanjem stanja u Izvozno-kreditnoj agenciji BiH i upućuje na razmatranje i usvajanje Predstavničkom domu Parlamentarne skupštine BiH.
2. Ističemo evidentnu potrebu i važnost daljnjeg postojanja IGA-e za kvalitetnu podršku bh. izvoznicima.
3. Predstavnički dom PSBiH od Upravnog odbora i rukovodstva IGA-e traži:
  - podnošenje detaljnog dodatnog izvještaja Vijeću ministara BiH o stanju u IGA-i s prijedlogom mjera za daljnji rad u pogledu izbora optimalnog organizacionog rješenja, potrebnih izmjena zakonskih i podzakonskih akata, definiranja prava i obaveza osnivača,
  - da prati stanje sudskih procesa s posebnim osvrtom na poslovanje i trenutnu situaciju u vezi s Unis Fabrikom cijevi Derventa i o tome informira nadležne institucije.
4. Ističemo da je Vijeće ministara BiH u svim sazivima od formiranja IGA-e odgovorno za nekonstituiranje Međuministarskog vijeća (član 15. Zakon o IGA), a što je značajno uticalo na nedovoljan nadzor u poslovanju i probleme u funkcioniranju Izvozno-kreditne agencije BiH.
5. Predstavnički dom PSBiH traži od Vijeća ministara BiH:
  - detaljnu analizu rada IGA-e uz poseban naglasak na poslovanje s Unis fabrikom cijevi Derventa u okolnostima nastalim usvajanjem plana finansijskog i operativnog restrukturiranja Unis fabrike cijevi Derventa,
  - hitno imenovanje Upravnog odbora IGA-e,
  - hitno donošenje konačne odluke u pogledu definiranja optimalnog rješenja za budući rad Izvozno-kreditne agencije BiH,
  - hitnu izradu i poboljšanje zakonskog okvira za rad Izvozno-kreditne agencije BiH.
6. Ističemo da IGA nije u potpunosti djelovala u skladu sa Zakonom o IGA-i. Postoje ozbiljne sumnje u nezakonito poslovanje *Unis fabrike cijevi Derventa* prilikom uvoza 65.000 tona repromaterijala radi prerade za daljnji izvoz koji nikada nije realiziran, te da Uprava za indirektno oporezivanje BiH nije zakonito postupala u slučaju praćenja uvoza repromaterijala, razduživanja PDV-a, te izvoza gotovih proizvoda *Unis-fabrike cijevi Derventa*
7. Jedan primjerak ovog izvještaja treba dostaviti Tužilaštvu BiH.

Istražna komisija jednoglasno je usvojila Izvještaj o radu Istražne komisije Predstavničkog doma PSBiH za utvrđivanje stanja u Izvozno-kreditnoj agenciji BiH, s nalazima i zaključcima sadržanim u njemu, te Predstavničkom domu PSBiH predlaže da usvoji Izvještaj o radu Istražne komisije Predstavničkog doma Parlamentarne skupštine BiH za utvrđivanje stanja u Izvozno-kreditnoj agenciji BiH.

Istražna komisija je za izvjestioca na sjednici Predstavničkog doma odredila predsjedavajućeg Komisije Predraga Kožula.

Dostavljeno:

- naslovu
- a/a

